

आकाशवाणी जयपुर-अजमेर
प्रादेशिक समाचार
दिनांक 24.10.2025 समय: 18.45 बजे

- प्रधानमंत्री नरेन्द्र मोदी वीडियो कॉन्फ्रेंस रे ज़रिये 51 हजार ऊँ बत्ता नौजवानां ने नौकरी लागण रा कागजात संप्या- विकसित भारत योजना री सरूआत कीनीं
- रक्षा मंत्री राजनाथ सिंह जैसलमेर मांय फौज रा आला अहलकारां ऊँ देश री हिफाज़त ऊँ जुड़्या मौजूदा हालात अर फौजी तैयारियां रो जायज़ो लीनीं
- राज्य सरकार निम्बाहेड़ा-मंगलवाड़ सड़क ने चार लेण री बणावण सारू नाबार्ड ऊँ 260 करोड़ रूप्या रो कर्ज लेवण री मंजूरी दीनीं
- मौसम महकमो प्रदेश रा कुछ हलकां मांय दीतवार ऊँ मौसम मांय बदलाव रा आसार जतायां

000

प्रधानमंत्री नरेन्द्र मोदी कह्यो है के रोजगार मेळा नौजवानां रा सपना सांचा करण रा ज़रिया बण गया हैं वे आज नई दिल्ली मांय राख्यी ज्या 17वां राष्ट्रीय रोजगार मेळा मांय वीडियो संदेश रे जरिये बोल रह्या हां कार्यक्रम रे दौरान रोजगार मेला पहल रा तैत न्यारा-न्यारा सरकारी महकमां अर संगठनां मांय नुवी नौकरी लाग्या 51 हजार ऊँ बत्ता नौजवानां ने नौकरी लागण रा कागजात संपी ज्यां ई मौके प्रधानमंत्री कह्यो के देश मांय आं रोजगार मेळां रे मार्फत 11 लाख ऊँ बत्ता नौजवानां ने नौकरी लागण रा कागजात दिया ज्या हैं प्रधानमंत्री 'विकसित भारत योजना' री शुरुआत ई कीनीं इण रो मकसद साढ़े तीन करोड़ नौजवानां ने नौकरी-धंधा रा मौका देवणो हैं श्री मोदी कह्यो के स्किल इंडिया मिशन सरीखा अभियान नौजवानां ने कौशल री सिखावण देवे हैं

जयपुर मांय राख्यी ज्या रोजगार मेळा मांय केंद्रीय मंत्री भागीरथ चौधरी, सांसद मंजू शर्मा, विधायक गोपाल शर्मा अर राज्यसभा सदस्य घनश्याम तिवारी समेत केई हस्तियां मौजूद रहीं ई मौके केंद्रीय कृषि अर किसान कल्याण राज्य मंत्री भागीरथ चौधरी कह्यो के प्रधानमंत्री मोदी देश रा नौजवानां ने नौकरी-धंधा रा मौका देवण सागे ई वां ने मजबूत बणा रह्या हैं वे कह्यो के साल 2047 ताई विकसित भारत बणावण रो सपनो सांचो करणो नौजवानां रा हाथ मांय हैं

जोधपुर मांय लगायी ज्या रोजगार मेळा मांय केन्द्रीय कानून मंत्री अर्जुनराम मेघवाल कह्यो के अब सरकारी नौकरियां सारू भर्तियां पूरी साफगोई सागे व्हे रही हैं

रक्षा मंत्री राजनाथ सिंह जैसलमेर रा दौरा रा तैत आज फौज रा कमान्डरां रा सम्मेलन री सदरत कीनीं वे चीफ ऑफ डिफेंस स्टाफ जनरल अनिल चौहान सागे फौज रा आला अहलकारां ऊँ देश री हिफाज़त ऊँ जुड़्या हालात अर फौजी तैयारियां रा बारा मांय चर्चा कीनीं सम्मेलन रे दौरान रक्षा मंत्री नमन केंद्र, सैनिक यात्री मित्र ऐप, अर उपकरण हेल्पलाइन ऐप री सरूआत कीनीं ई सम्मेलन मांय देश री सरहद रा मौजूदा हालात, फौजी हलका मांय व्हे रह्या तकनीकी बदलाव अर आवता बगत मांय देश रा फौजी बूता ने मजबूत बणावण रा बारा मांय चर्चा करी जा रही हैं इण ऊँ पैली रक्षा मंत्री जैसलमेर रा तनोट माता मिंदर मांय पूजा-अर्चना कीनीं वे साल 1965 मांय पाकिस्तान रे खिलाफ व्ही लड़ाई रे दौरान मंदिर रा आंगणा मांय पड़्या पण नी फाट सक्या बम ई देख्यां

000

लोकसभा अध्यक्ष ओम बिरला आज कोटा मांय रेलवे रा विकास रा कामां रो जायज़ो लीनीं वे अहलकारां सागे कोटा अर न्यू कोटा रेलवे टेशनां माथे चाल रह्या कामां री जाणकारी लीनीं अर ज़रूरी हुकम

दीनां लोकसभा अध्यक्ष भामाशाह कृषि उपज मंडी मांय पूजा-अर्चना कर र कारोबारियां अर किसाना सागे बातचीत कीनीं

000

पुलिस महानिदेशक राजीव कुमार शर्मा कह्यो है के देश मांय लागू करी ज्या तीन नुवा आपराधिक कानूनां सागे न्याय प्रणाली मांय नुवी सोच पैदा व्ही हैं वे आज जयपुर रा पुलिस मुख्यालय मांय राख्यी ज्या दीवाळी स्नेह मिलन समारोह मांय बोल रह्या हां डीजीपी पुलिस महकमा रा सगळा अहलकारां अर कर्मचारियां ने शुभकामनावां देता थकां नुवी ऊर्जा अर समर्पण सागे काम करण बाबत् कह्यो डीजीपी कह्यो के पुलिस रो काम कानून-व्यवस्था बणायी राखण सागे ही हर रेहवासी रा मन मांय हिफाजत अर भरोसा री भावना जगावणो हैं

000

उपमुख्यमंत्री दीया कुमारी निम्बाहेड़ा-मंगलवाड़ सड़क ने चार लेन री बणावण सारू नाबार्ड ऊँ 260 करोड़ रुपया रो कर्ज लेवण री मंजूरी दे दीनी हैं वे हुडको ऊँ लिया ज्या पौने दो सौ करोड़ रुपया रा कर्ज ने ई ब्याज री कम रेट रे कारण नाबार्ड मांय शिफ्ट करण री मंजूरी दीनीं वे अहलकारां ने काम री गुणवत्ता माथे खास ध्यान देवण बाबत् ई कह्यो

000

जैसलमेर-जोधपुर हाईवे माथे थइयात गांव कने लारला दिनां एक बस मांय लाय लाग जावण रा हादसा री एफएसएल जांच रपट मिल ग्यी हैं रपट रे मुजब बस री छत माथे लाग्योड़ा एस.सी. रा तारां मांय शॉर्ट सर्किट रे कारण लाय लागी हीं जैसलमेर रा एस.पी. अभिषेक शिवहरे आ जाणकारी दीनीं वे बतायो के जोधपुर अर जयपुर री विधि विज्ञान प्रयोगशालावां कानी ऊँ मिल करी ज्या जांच रा नतीजां रे मुजब शॉर्ट सर्किट रे कारण निकळी चिंगारी ऊँ बस रा ऊपरी हिस्सा मांय धुंओ भरग्यो हों

000

राष्ट्रीय सुरक्षा कानून-एनएसए रा तैत पकड़ र जोधपुर री जेल मांय बंद करी ज्या लद्दाख रा सोनम वांगचुक रा मामला मांय एडवाइजरी बोर्ड रा अध्यक्ष अर पैली वाळा जज एम.के. हुजूरा, जिला जज मनोज परिहार अर सामाजिक कार्यकर्ता स्पल जयेश अंगमो जोधपुर सेंट्रल जेल पूग्यां ओ दल वांगचुक री हिरासत रे खिलाफ वां री जोड़ायत गीतांजलि अंगमो कानी ऊँ राज्य अर केंद्र सरकार ने दिया ज्या कागद पाछे मामला री जांच कर रह्यो हैं एडवाइजरी बोर्ड मामला रो जायजो ले र वांगचुक ने हिरासत मांय राखण सारू जरूरी कानूनी आधार हैं या नहीं, ओ तैय करेलां सुप्रीम कोर्ट ई ई मामला री सुणवाई कर रह्यो हैं

000

जनता ने जीएसटी बचत उत्सव रो पूरो फायदो मिल रह्यो हैं ग्राहकां ने सरकार रा ई जतन ऊँ दीवाळी रे मौके खूब फायदो मिल्यो भीलवाड़ा रा दुर्गेश शर्मा कह्यो के जीएसटी बचत उत्सव मझला दर्जा रा पिरवारां सारू ई दीवाळी ने खुशियां भरी बणा दीनीं

000

जालौर जिला री नौ ग्राम पंचायतां मांय आज ग्रामीण सेवा शिविर लगायी ज्या जिला कलेक्टर डॉ. प्रदीप के. गावंडे लेटा ग्राम पंचायत मांय लगायी ज्या शिविर रो दौरा कीनो, जनता री समस्यावां सुणी अर पात्र किसानां ने मिनी बीज किट बांट्यां वे अहलकारां ने शिविर मांय मिल्या मामलां रा बेगा निपटारा रा हुकम दीनां

000

उदयपुर अर कोटा संभाग रा कुछ हलका मांय 26 ऊँ 28 अक्टूबर बीचे बादळां री गाज सागे बिरखा व्हेवण रा आसार हैं 27 अर 28 अक्टूबर ने आं हलका मांय बीजळी पड़बा सागे तेज बिरखा व्हेवण री संभावना हैं हालांकि राज्य रा बाकी हलकां मांय मौसम सूखो रेहवण रा आसार हैं

000

प्रधानमंत्री नरेन्द्र मोदी ई महीना री 26 तारीख ने आकाशवाणी ऊँ प्रसारित कर्या जावण वाळा खास कार्यक्रम “मन की बात” मांय विचार बतावेलां आ ई कार्यक्रम री 127वीं कड़ी व्हेलां ओ कार्यक्रम आकाशवाणी अर दूरदर्शन रा पूरा नेटवर्क, आकाशवाणी समाचार री वेबसाइट अर न्यूज़ ऑन ए आई आर मोबाइल एप माथे ई प्रसारित कर्यो जावेलां मन की बात कार्यक्रम रो प्रसारण आकाशवाणी समाचार, डीडी न्यूज़, प्रधानमंत्री रा दफ्तर अर सूचना अर प्रसारण मंत्रालय रा यू-ट्यूब चैनलां माथे ई कर्यो जावेलां

000

जन योजना अभियान—सबकी योजना, सबका विकास रा बारा मांय दो मिनट री जन सेवा जागरूकता फिल्म आज ऊँ 6 नवंबर तांई देश भर रा सिनेमाघरां मांय बतायी जा रही हैं पंचायती राज मंत्रालय रे मुजब इण रो मकसद साल 2026—27 सारू पंचायत विकास योजनावां री तैयारी मांय जनता री भागीदारी ने बधावो देवणो हैं

000

रेलवे रा अजमेर—पालनपुर खण्ड माथे फालना टेशन कने मरम्मत रा काम रे कारण 30 अक्टूबर ऊँ 3 नवंबर तांई कुछ गाड़ियां री आवण—जावण माथे असर पडेला । उत्तर—पश्चिम रेलवे रे मुजब साबरमती—जोधपुर गाड़ी तय बगत ऊँ एक घंटा मोड़ी रवाना व्हेलां साबरमती—आगरा कैंट अर साबरमती—ग्वालियर गाड़ियां ई गेला मांय करीब आधा घंटा तांई रोकी जावेलां ई बीचे रेलवे 26 अर 27 अक्टूबर ने जोधपुर—बान्द्रा टर्मिनस बीचे एक जोड़ी सुपरफास्ट स्पेशल गाड़ी चलावेला ।

000